



Կանոններում գործածվող հիմնական եզրույթներ և հասկացություններ

Սույն կանոններում գործածվող հիմնական եզրույթներն ու հասկացությունները սահմանվում են հետևյալ կերպ:

- **ՀՀ կրթության, գիտության, մշակույթի և սպորտի, ԱՀ կրթության, գիտության և սպորտի նախարարություններ** – Պետական մարմիններ, որոնց հովանու ներքո է իրականացվում մրցույթը Հայաստանում և Արցախում:
- **«Այբ» կրթական հիմնադրամ** – Մրցույթի բացառիկ կազմակերպիչը Հայաստանում և Արցախում (Երևան 0037, Ազատության պող., 1/21-1, (060) 70-17-07, kangaroo@ayb.am, www.kangaroo.am, www.ayb.am):
- **«Կենգուրու առանց սահմանների» միջազգային ընկերակցություն (KSF)** – Կազմակերպիչը ողջ աշխարհում (կենտրոնական գրասենյակը գտնվում է Փարիզում, www.aksf.org):
- **Մարզային համակարգողներ** – Մարզերում մրցույթի կազմակերպման համար «Այբ» հիմնադրամի պատասխանատուներ: Բոլոր հարցերով անմիջապես դիմեք նրանց: Համակարգողների տվյալները տրված են www.kangaroo.am կայքում և մրցույթի իրազեկման կյուբերում:
- **Դպրոց** – «Կենգուրու» մրցույթին մասնակցության հայտ ներկայացրած հանրակրթական հաստատություն:
- **Միացող դպրոց** – Այն դպրոցը, որի մասնակից աշակերտների թիվը մեծ է 5-ից և փոքր է 40-ից: Նման դպրոցը մրցույթի օրը միանալու է այլ դպրոցի:
- **Դպրոցի պատասխանատու** – Դպրոցի կողմից լիազորված աշխատակից, որը կհամակարգի դպրոցում մրցույթի անցկացման հետ կապված բոլոր աշխատանքները: «Այբ»-ը և մարզային համակարգողները կապ կպահպանեն անմիջապես դպրոցի պատասխանատուի հետ:
- **Տարածքային կենտրոններ** – Կենտրոններ, որոնք գործելու են միայն մրցույթի օրը գրեթե բոլոր քաղաքային համայնքներում: Այս կենտրոններից դպրոցի պատասխանատուները առավոտյան կվերցնեն մրցութային փաթեթները և այնտեղ էլ մրցույթի ավարտից հետո կհանձնեն պատասխանների թերթիկներով փաթեթները: Տարածքային կենտրոնների ցանկը նախապես ուղարկվում է դպրոցների էլ. հասցեներին և տեղադրվում www.kangaroo.am կայքում:
- **Դպրոցի դիտորդներ** – Դպրոցի կողմից լիազորված անձինք (այդ թվում՝ նաև ծնողներ), ովքեր կհետևեն մրցույթի կանոնների պահպանմանն իրենց իսկ դպրոցում: Մասնակից դպրոցում պետք է ապահովվի առնվազն մեկական դիտորդի ներկայությունը յուրաքանչյուր սրահում (դասասենյակում), եթե մրցույթը դպրոցում իրականացվում է ոչ թե մեկ, այլ մի քանի սրահում:
- **«Այբ»-ի դիտորդներ** – «Այբ» հիմնադրամի կողմից լիազորված անձինք, ովքեր մրցույթի օրը կայցելեն մի շարք դպրոցներ՝ կամայական ընտրությամբ, և կհետևեն մրցույթի կանոնների պահպանմանը:
- **Մասնակիցներ** – Դպրոցի 3-12-րդ դասարանցիներ, ովքեր մինչև հայտարարված վերջնաժամկետը գրանցվել են իրենց դպրոցի մասնակիցների ցուցակում՝ ներկայացնելով վճարման անդորրագրերը:
- **Հուշանվերներ** – Մրցույթի օրը բոլոր մասնակիցներին տրվող փոքրիկ նվերներ:

- **Մրցանակներ** – Արդյունքների ամփոփումից հետո բոլոր մասնակիցներին տրվող մասնակցության հավաստագրեր: Մրցանակակիրներին շնորհվում են խրախուսական մրցանակներ:
- **Մրցույթի մրցանակակիրներ** – Մրցույթն ունի երեք կարգի մրցանակակիր՝ *հաղթող* (3-4-րդ դասարանցիներ, ովքեր հավաքել են 91-96 միավոր, կամ 5-12-րդ դասարանցիներ, ովքեր հավաքել են 115-120 միավոր), *լավագույն* (3-4-րդ դասարանցիներ, ովքեր հավաքել են 64-90 միավոր, կամ 5-12-րդ դասարանցիներ, ովքեր հավաքել են 80-114 միավոր) և *հատուկ*: Այն դպրոցում, որտեղ տվյալ տարի չեն լինում հաղթող կամ լավագույն մրցանակակիրներ, տոկոսային հարաբերությամբ ամենաբարձր արդյունք արձանագրած մասնակիցը մրցանակակիր է ճանաչվում *հատուկ* անվանակարգում:
- **Մրցույթի մասնակցության հայտ** – Դպրոցի կողմից լրացված և մինչև հայտարարված վերջնաժամկետը «Այբ» հիմնադրամ ներկայացված հայտ: Դպրոցը կմասնակցի մրցույթին միայն նշված ժամկետում հայտը ներկայացնելու դեպքում: Հայտին պետք է պարտադիր կցվեն մասնակիցների ցուցակը և վճարման անդորրագրերը: Եթե դպրոցում մասնակիցների թիվը փոքր է 5-ից, տվյալ դպրոցը մասնակցության հայտ ներկայացնել չի կարող:
- **Մասնակիցների ցուցակ** – Մասնակից աշակերտների ցուցակ, որը կազմվում է դպրոցում: Ցուցակում ներառվում են մրցույթին մասնակցել ցանկացող բոլոր աշակերտները, ովքեր ներկայացրել են մասնակցության վճարի բանկային անդորրագրերը: Մասնակիցների ցուցակի տպագիր տարբերակը ներկայացվում է հայտի հետ, իսկ էլեկտրոնայինը՝ պարտադիր ուղարկվում kangaroo@ayb.am էլ. հասցեին:
- **Մրցութային փաթեթ** – Մրցույթի օրը դպրոցների պատասխանատուներին տարածքային կենտրոններից տրվող փաթեթ, որը ներառում է խնդիրների տարբերակները՝ ըստ տարիքային խմբերի, պատասխանների լրացման թերթիկները, դպրոցի մասնակից աշակերտների ցուցակը, դպրոցի համար մրցութային օրվա ուղեցույցը և մասնակիցների հուշանվերները: Դպրոցի ծածկագիրը փակցված է փաթեթի վրա, իսկ դպրոցի կողմից լրացվող արձանագրությունը՝ պատասխանների թերթիկների ծրարի վրա:
- **Դպրոցի ծածկագիր** – Դպրոցին «Այբ»-ի կողմից շնորհվող թվային անփոփոխ ծածկագիր (բոլոր տարիների համար), որը կարող եք գտնել www.kangaroo.am կայքում կամ իմանալ մարզային համակարգողներից: Այս ծածկագիրն աշակերտները պարտադիր պետք է գրեն պատասխանների լրացման իրենց թերթիկների վրա:
- **Մասնակցի հերթական համար** – Մասնակիցների վերջնական ցուցակում աշակերտի հերթական համարը: Փաստացի մասնակիցների վերջնական ցուցակը ճշգրտվում է մրցույթի ընթացքում «Այբ»-ից ստացված ցուցակի հիման վրա և ավարտից հետո հանձնվում տարածքային կենտրոն: Հերթական համարով և դպրոցի ծածկագրով է համակարգիչը հասկանալու, թե ում է պատկանում տվյալ աշխատանքը:

1. Մրցույթի մասնակիցները

- 1.1. Մրցույթի հիմնական նպատակը դպրոցականների ամենալայն շրջանում մաթեմատիկայի հանդեպ հետաքրքրության խթանումն է, ուստի մրցույթին կարող են մասնակցել 3-12-րդ դասարանցի բոլոր ցանկացողները: Մրցույթի խնդիրների տարբերակները բաժանված են ըստ հինգ տարիքային խմբերի՝ 3-4-րդ, 5-6-րդ, 7-8-րդ, 9-10-րդ և 11-12-րդ դասարաններ: *Որևէ նախնական ընտրություն կատարելը, որևէ աշակերտի կամքին հակառակ նրան մրցույթին մասնակցելուց զրկելը կամ որևէ կերպով նրա մասնակցությանը խոչընդոտելը դեմ են «Կենգուրու» մրցույթի սկզբունքներին և անընդունելի են:*
- 1.2. Ովքեր կարող են մասնակցել մրցույթին

- 3-12-րդ դասարանի աշակերտներ այն դպրոցից, որը մասնակցության հայտ է ներկայացրել և որի ցուցակներում գրանցված են 40 և ավելի մասնակիցներ: Այս աշակերտները մասնակցում են իրենց իսկ դպրոցում:
- 3-12-րդ դասարանի աշակերտներ այն դպրոցից, որը մասնակցության հայտ է ներկայացրել, սակայն որի ցուցակներում գրանցված են 5-ից ավելի և 40-ից պակաս մասնակիցներ: Այս աշակերտները մասնակցում են մրցույթին այլ դպրոցում, որի հետ իրենց դպրոցը նախապես պայմանավորվում է միանալու վերաբերյալ և նշում այդ մասին մասնակցության հայտում:
- 3-12-րդ դասարանի աշակերտներ, որոնց դպրոցը մասնակցության հայտ չի ներկայացրել: Այս աշակերտները կարող են իրենց նախաձեռնությամբ նախօրոք դիմել որևէ այլ դպրոցի, ստանալ այդ դպրոցի ղեկավարության թույլտվությունը, գրանցվել մասնակիցների ցուցակում, տրամադրել վճարման անդորրագիրը և մրցույթի օրը ներկայանալ այդ դպրոց:

2. Մրցույթի անցկացումը

- 2.1. Հայաստանում և Արցախում մրցույթի բացառիկ կազմակերպիչը «Այբ» կրթական հիմնադրամն է: Մրցույթն իրականացվում է Հայաստանում ՀՀ կրթության, գիտության, մշակույթի և սպորտի, Արցախում՝ Արցախի Հանրապետության կրթության, գիտության և սպորտի նախարարությունների հովանու ներքո (www.edu.am, edu.nkr.am):
- 2.2. Մրցույթի կազմակերպման աշխատանքներում ներգրավված են «Այբ» կրթական հիմնադրամը, մարզային համակարգողները և մասնակից դպրոցները: Յուրաքանչյուր մասնակից դպրոց հենց ինքն է նշանակում **դպրոցի պատասխանատուին**, որը համակարգում է մրցույթի անցկացման աշխատանքներն անմիջապես դպրոցում:
- 2.3. Մրցույթն անցկացվում է տվյալ դպրոցում, եթե գրանցված մասնակիցների թիվը 40 և ավելի է: Եթե մասնակից աշակերտների թիվը 5-ից մեծ է և 40-ից փոքր, ապա դպրոցը մրցույթին մասնակցում է՝ մրցույթի օրը միանալով մեկ այլ դպրոցի, որի հետ նախապես ձեռք է բերել համապատասխան պայմանավորվածություն և նշել այդ մասին մասնակցության հայտում: **Եթե դպրոցում մասնակիցների թիվը փոքր է 5-ից, տվյալ դպրոցը մասնակցության հայտ ներկայացնել չի կարող:**
- 2.4. Յուրաքանչյուր մասնակից աշակերտ (անկախ մրցույթի արդյունքներից) և մասնակից դպրոց (անկախ այն բանից՝ մրցույթն իրականացվել է այդ, թե մեկ այլ դպրոցում) ստանում է **մասնակցության հավաստագիր**:
- 2.5. Դպրոցի պատասխանատուն մրցույթի մասին տեղեկացնում է աշակերտներին, գրանցում մասնակիցներին «Մասնակիցների ցուցակ» հատուկ նիշքում (file), հավաքում վճարման անդորրագրերը (բնօրինակները կամ պատճենները), ուղարկում «Մասնակիցների ցուցակի» վերջնական տարբերակը kangaroo@ayb.am էլ. հասցեին: Այնուհետև պատասխանատուն կցում է «Մասնակիցների ցուցակի» տպված տարբերակն ու վճարման անդորրագրերը դպրոցի մասնակցության հայտին և մինչև հայտարարված վերջնաժամկետը ներկայացնում կամ փոստով ուղարկում «Այբ» կրթական հիմնադրամի գրասենյակ, որտեղ և պատրաստվում են մրցույթի նյութերը:
- 2.6. Մրցույթն անցկացվում է մարտի երրորդ հինգշաբթի օրը: Հայաստանի և Արցախի դպրոցներում մրցույթն անցկացվում է 12:00-14:00 ժամանակահատվածում, այսինքն՝ բուն մրցույթը պետք է սկսել ամենաշուտը ժամը 12:00-ին և ամենաուշը՝ 14:00-ին: Մրցույթի օրվա առավոտյան դպրոցի պատասխանատուն տարածքային կենտրոնից վերցնում է մրցութային փաթեթը: «Այբ»-ը տարածքային կենտրոնների մասին տեղեկությունը տեղադրում է www.kangaroo.am կայքում մրցույթի օրից մեկ շաբաթ առաջ: Մրցույթի խնդիրները տրվում են դպրոցի պատասխանատուին կնքված փակ ծրարով, որը պետք է

բացվի *միայն մրցույթի մեկնարկի պահին՝ մասնակիցների ներկայությամբ*: Խնդիրները, պատասխանների լրացման թերթիկները և հուշանվերները պատրաստվում և դպրոցներին ուղարկվում են դպրոցի «Մրցույթի մասնակցության հայտում» նշվածից առնվազն 10%-ով ավելի քանակով՝ յուրաքանչյուր տարիքային խմբի համար: Այդ 10%-ի սահմաններում նախապես չգրանցված աշակերտները կարող են մրցույթին մասնակցել՝ մրցույթի օրը ներկայանալով դպրոց և պատասխանատուին տրամադրելով վճարման անդորրագիրը:

- 2.7. Այն դպրոցները, որոնք միավորվել են մրցույթի իրականացման համար, կստանան *մեկ (ընդհանուր) մրցութային փաթեթ*, որը կտրվի այն դպրոցի պատասխանատուին, որտեղ ֆիզիկապես իրականացվում է մրցույթը:
- 2.8. Այն դպրոցներին, որոնց տարածքային կենտրոնները գտնվում են ոչ իրենց համայնքում, տրվում է մրցութային փաթեթի ստացման ճանապարհաձևախսի փոխհատուցում՝ 3000 դրամի չափով: Փոխհատուցումը փոխանցվում է **դպրոցի բանկային հաշվեհամարին** մրցույթից հետո երկուսուկես ամսվա ընթացքում: Դպրոցն իր բանկային տվյալները (բանկի անվանումն ու հաշվեհամարը) նշում է մրցույթի օրը՝ պատասխանների թերթիկների ծրարի վրա փակցված արձանագրության մեջ: Սխալ նշված բանկային տվյալների համար «Այբ»-ը պատասխանատվություն չի կրում: **ՈՒՇԱԴՐՈՒՅՑՈՒՆ: Ծանապարհաձևախսի փոխհատուցման նկարագրված մոտեցումն այս պահին վերանայման փուլում է: «Այբ» հիմնադրամը լրացուցիչ կտեղեկացնի համապատասխան դպրոցներին վերջնական որոշման մասին:**
- 2.9. Մասնակիցներին պետք է նստեցնել մեկ սրահում (դասասենյակում) կամ դահլիճում: Եթե դա անհնար է, ապա աշակերտներին կարելի է նստեցնել մի քանի սրահում (դասասենյակում) այնպես, որ նույն սրահում լինեն տարբեր տարիքային խմբի մասնակիցներ, իսկ յուրաքանչյուր սրահում՝ առնվազն մեկական դիտորդ: **Հիշեցնենք, որ մրցույթի հեղինակությունն ու արդյունքների ճշտությունը կախված են մրցույթի անցկացման պատշաճությունից:**
- 2.10. Մրցույթի ժամանակ մասնակիցներին պետք է նստեցնել հնարավորինս ազատ (խիստ ցանկալի է առանձին-առանձին՝ յուրաքանչյուր սեղանի առաջ մեկ աշակերտ): Եթե դա անհնար է, ապա խորհուրդ է տրվում կողք կողքի նստեցնել տարբեր տարիքային խմբերի աշակերտների, ովքեր չունեն նույն խնդիրները: **Չի կարելի կողք կողքի նստեցնել հարակից տարիքային խմբերի աշակերտների**, օրինակ՝ 7-8-րդ դասարանցիներին՝ 5-6-րդ դասարանցիների կամ 9-10-րդ դասարանցիների հետ:
- 2.11. Մրցույթի ժամանակ սեղաններին պետք է լինեն միայն «Կենգուրուի» խնդիրները, պատասխանների լրացման թերթիկը, մուգ կապույտ կամ սև գրիչ և, ցանկության դեպքում, սևագրի թերթիկ, որը պետք է լինի **մաքուր թուղթ**: Չի թույլատրվում որպես սևագիր օգտագործել տետր կամ նշատետր:
- 2.12. Մրցույթի ընթացքում **արգելվում է օգտագործել հեռախոս և հաշվողական այլ սարքեր**: Մրցույթի 75 րոպեների ընթացքում լռության պահպանումը պարտադիր է: **Հուշումները, արտագրությունները, միջամտությունները, խոսելն ու աղմկելը խստիվ արգելվում են**:
- 2.13. Մրցույթի սկզբում բոլոր մասնակիցներին բաժանվում են **հուշանվերները և պատասխանների լրացման թերթիկները**: Թերթիկի լրացման համար օգտագործել **միայն մուգ կապույտ կամ սև գրիչ**: Այլ գույնի գրիչ կամ մատիտ օգտագործել չի թույլատրվում:
- 2.14. Մրցույթի կանոնների բացատրության և պատասխանների լրացման թերթիկներում անձնական տվյալները գրանցելու համար նախատեսվում է մոտ 15 րոպե՝ նախքան խնդիրները մասնակիցներին բաժանելը: Մրցույթի խնդիրների լուծման համար հատկացվում է ուղիղ **75 րոպե**: Այս ժամանակը հաշվարկվում է խնդիրների թերթիկները (թեստերը) մասնակից աշակերտներին բաժանելու պահից: Այսպիսով՝ մրցույթի անցկացման համար պահանջվում է մոտ 1 ժամ 30 րոպե:

2.15. Համոզվեք, որ բոլոր մասնակիցները գրել են անհրաժեշտ տվյալները պատասխանների լրացման թերթիկի վրա, և **միայն դրանից հետո բաժանեք խնդիրները**: Դպրոցի ծածկագիրը (այն կլինի նաև մրցութային փաթեթում) գրեք գրատախտակի վրա և խնդրեք մասնակից աշակերտներին այն ուշադիր արտագրել պատասխանների լրացման թերթիկի համապատասխան հատվածում: Բացի անուն-ազգանունից և դպրոցի ծածկագրից՝ պատասխանների լրացման թերթիկում աշակերտները պետք է լրացնեն իրենց հերթական համարն ըստ մասնակիցների վերջնական ցուցակի, որը ներառված է «Այբ»-ի կողմից ուղարկվող մրցութային փաթեթում: **ԵՔԵ ԴՊՐՈՑԻ ԾԱԾԿԱԳԻՐԸ ԵՎ ԱՇԱԿԵՐՏԻ ՀԵՐԹԱԿԱՆ ՀԱՄԱՐԸ (ԸՍՏ ՑՈՒՑԱԿԻ) ՉԵՆ ՆՇՎՈՒՄ, ԱՊԱ ՀԱՄԱԿԱՐԳԻՉԸ ՉԻ ՀԱՍԿԱՆԱ, ԹԵ ՈՒՄ Է ՊԱՏԿԱՆՈՒՄ ՏԿՅԱԼ ԱՇԽԱՏԱՆԸ**: Այս ամենից հետո՝ միայն, բոլոր մասնակիցների ներկայությամբ, բացեք խնդիրների ծրարը և ըստ տարիքային խմբերի բաժանեք խնդիրների թերթիկները:



խնդիրների թերթիկների (թեստերի) ծրարը բացվում է, և թերթիկները բաժանվում են միայն այն բանից հետո, երբ բոլորը լրացրել են անհրաժեշտ տվյալները պատասխանների լրացման թերթիկներում: Այս պահից հաշվարկվում է մրցույթի ժամանակը՝ 75 րոպե:

2.16. Խորհուրդ տվեք մասնակիցներին երկար կանգ չառնել մեկ հարցի վրա, եթե դրան պատասխանել չի հաջողվում: Նպատակահարմար է անցնել հաջորդ հարցին, ապա վերջում վերադառնալ չլուծված խնդրին:

2.17. Լուծելով խնդիրը՝ մասնակիցը «X» է դնում տվյալ խնդրի համարին համապատասխանող սյունակում ընտրված պատասխանի վանդակում: **Պատասխանների թերթիկում ջնջում կամ որևէ այլ նշում անելն արգելված է**: Մասնակից աշակերտն ունի հնարավորություն՝ կատարելու **առավելագույնը 3 ուղղում**: Ուղղումների համար պատասխանների լրացման թերթիկում նախատեսված է երեք լրացուցիչ դաշտ, որոնցում աշակերտը լրացնում է ուղղվող խնդրի համարը և նշում ընտրված պատասխանի տարբերակը: Եթե միևնույն խնդրի համար աշակերտը պատասխանել է երկու տեղ՝ և՛ ընդհանուր, և՛ ուղղումների դաշտում, ապա որպես **վերջնական պատասխան ընդունվում է ուղղումների** դաշտում նշվածը: **Եթե աշակերտը չի կարողանում կամ չի կողմնորոշվում, չի հասկանում, թե ինչպես է ուղղումների դաշտում նշումներ կատարելու, դիմում է պատասխանատուին, որը բացատրում է աշակերտին, թե ինչպես է դա արվում**:

2.18. Յուրաքանչյուր խնդիր ունի պատասխանի հնարավոր հինգ տարբերակ, որոնցից միայն մեկն է ճիշտ: Եթե պատասխանների լրացման թերթիկում որևէ խնդրի համար մասնակիցը նշում չի անում կամ նշում է մեկից ավելի պատասխան, ապա խնդիրը համարվում է չլուծված:

2.19. Սկսվելուց ուղիղ 75 րոպե հետո մրցույթն ընդհատվում է, և պատասխանատուն հավաքում է պատասխանների լրացման թերթիկները: Թեստերը մնում են մասնակից աշակերտների մոտ: **Պատասխանների բոլոր թերթիկները և մասնակիցների վերջնական (ճշտված) ցուցակները անմիջապես փակվում են** համապատասխան ծրարում, որի վրա ստորագրում են պատասխանատուն, դպրոցից երկու դիտորդ, տնօրենը (կամ փոխտնօրենը), ընդհանուր թվով՝ 4 (չորս) հոգի, և կնքում դպրոցի կնիքով: Ծրարը **նույն օրը** դպրոցի պատասխանատուն հանձնում է տարածքային կենտրոն **մինչև ժամը 17:00-ն**:

2.20. Հանձնվող ծրարում պարտադիր պիտի ներառվի նաև մասնակիցների ցուցակը, որը պետք է ճշտվի ըստ մրցույթի փաստացի մասնակիցների տվյալների:



Մասնակիցների ցուցակները և պատասխանների թերթիկները դրվում են մեկ ծրարում ու փակվում: Ուստի խստորեն խորհուրդ է տրվում ճշտել ցուցակները ոչ թե մրցույթի ավարտից հետո, այլ ընթացքում:

- 2.21. Միավորված դպրոցները գետնոլում են պատասխանների թերթիկներն ու մասնակիցների ցուցակները մեկ ընդհանուր ծրարում:
- 2.22. Մրցույթի ավարտին **լրացվում է արձանագրությունը**, որը փակցված է պատասխանների լրացված թերթիկների համար նախատեսված ծրարի վրա:

3. Արդյունքների ամփոփում

- 3.1. Բոլոր մասնակիցների աշխատանքները տարածքային կենտրոններից բերվում են «Այբ» կրթական հիմնադրամի գրասենյակ, որտեղ և իրականացվում է ստուգումը: Պատասխանների բոլոր թերթիկները մշակվում են տեսաձրիչի (սկաներ) միջոցով և մուտքագրվում համակարգիչ, ապա հատուկ համակարգչային ծրագրերն իրականացնում են ստուգումը: Ստուգման արդյունքում ձևավորվում են ընդհանուր ցուցակներ, դրանց հիման վրա կազմվում են հաշվետվություններ, որոնք հետագայում ուղարկվում են մասնակից դպրոցներին: **Յուրաքանչյուր դպրոց ստանում է հաշվետվություն միայն իր մասնակից աշակերտների արդյունքների մասին:** Բացի դրանից, յուրաքանչյուր մասնակից դպրոց ստանում է մասնակցության հավաստագիր:
- 3.2. Աշխատանքների ստուգումը տևում է առնվազն մեկուկես ամիս, որից հետո մոտ մեկ շաբաթվա ընթացքում կազմվում են հաշվետվությունները: **«Այբ»-ն իրավասու է հաշվի չառնելու այն աշխատանքները, որոնք ներկայացվել են հաստատված ժամկետից ուշ՝ առանց հիմնավոր պատճառի:**
- 3.3. Մրցույթի արդյունքների հավաստիությունն ու անկողմնակալությունը ապահովելու նպատակով և՛ «Այբ»-ը, և՛ դպրոցի պատասխանատուները վերահսկում են մրցույթի կանոնների պահպանումը:
- 3.4. Բազմաթիվ տարիների համաշխարհային փորձը հաստատում է, որ մրցույթի մասնակիցների ինքնուրույն աշխատելու դեպքում մասնակիցների տված պատասխանների (ինչպես ճիշտ, այնպես էլ սխալ) հաջորդականությունների ամբողջական համընկնում ծայրահեղ հազվադեպ է լինում: Օրինակ՝ եթե մրցույթին մասնակցել է 100 000 աշակերտ, ապա հնարավոր է ոչ ավելի, քան մեկ-երկու աշխատանքների համընկնում, որոնք պատկանում են տարբեր դպրոցներում սովորող նույն տարիքային խմբի աշակերտներին, ովքեր թույլ են տվել միևնույն միայն մեկ սխալը: Երկու սխալի համընկնման դեպքեր գրեթե չեն լինում, իսկ մեծ թվով սխալների համընկնում գործնականորեն անհնար է: Հասկանալի է, որ որքան շատ են ընդհանուր սխալները, այնքան վստահ կարելի է պնդել, որ եղել են խախտումներ, այդ թվում արտագրումներ և հուշումներ:
- 3.5. Պատասխանների համակարգչային մշակումից հետո **կատարվում է տվյալ դպրոցի միևնույն տարիքային խմբի բոլոր աշխատանքների համադրում** համընկնումների հայտնաբերման նպատակով: Արդյունքների ամփոփ ցանկերում համընկնող աշխատանքների կողքին կատարվում է «արտագրության կասկած» նշումը:
- 3.6. Վերահսկողության և վերլուծության արդյունքում մրցույթի կանոնների կոպիտ խախտումների բացահայտման դեպքում «Այբ»-ն **իրավասու է որակազրկելու** (հանելու մասնակիցների ցուցակից կամ չեղյալ համարելու առանց որևէ փոխհատուցման) ինչպես առանձին մասնակիցների, այնպես էլ ողջ դպրոցի բոլոր մասնակիցների կամ նրա որևէ տարիքային խմբի աշխատանքները: Աշխատանքների այսպիսի որակազրկման կամ կանոնների կոպիտ խախտման վերաբերյալ «Այբ»-ը նամակ-նախազգուշացում է ուղարկում տվյալ դպրոցին՝ խնդրելով ձեռնարկել բոլոր միջոցները՝ կանոնների խախտումներն ապագայում բացառելու նպատակով: Նույն դպրոցին երկու տարի անընդմեջ նամակ-նախազգուշացում ուղարկելու դեպքում «Այբ»-ը ստիպված կլինի մեկ տարով չթույլատրել այդ դպրոցին մասնակցել մրցույթին:



Խստորեն խորհուրդ է տրվում զերծ մնալ մրցույթի անցկացման կանոնների որևէ խախտումից՝ հնարավորություն տալով մասնակից աշակերտներին ինքնուրույն փորձելու իրենց ուժերը: Հիշեք, որ «բարի ցանկությունները» կարող են «արջի ծառայություն» մատուցել: չէ՞ որ ավելի լավ է իրական արդյունքներով ոգևորվել, քան որակազրկված լինել:

3.7. Մինչ արդյունքների հրապարակումը մրցույթի կազմակերպիչները պարտավոր են լրացուցիչ հանդիպում (թեստավորում, հարցազրույց) անցկացնել հավանական հաղթողների (հաղթողի միավորների շեմը հաղթահարած մասնակիցների) հետ՝ պարզելու վերջիններիս արդյունքների իսկությունը: Լրացուցիչ հանդիպման արդյունքում հավանական հաղթողը հավակնում է ճանաչվելու բացարձակ հաղթող, եթե լրացուցիչ հանդիպման ընթացքում տրված բոլոր հարցերին ու խնդիրներին տվել է ճիշտ պատասխաններ: Արդյունքների հավաստիության կասկածի կամ լավագույն արդյունք արձանագրած մասնակիցների մեծ թվի դեպքում «Այբ» կրթական հիմնադրամն իրավասու է վերջիններիս հետ նույնպես անցկացնելու լրացուցիչ հանդիպում (թեստավորում, հարցազրույց)՝ նրանց արդյունքների իսկությունը պարզելու և վերջնական մրցանակակիրներին որոշելու համար: Լրացուցիչ հանդիպումների արդյունքների վերջնական հաստատումն արվում է «Այբ» կրթական հիմնադրամի կողմից, ինչի վերաբերյալ նամակ է ուղարկվում լրացուցիչ հանդիպման մասնակից աշակերտների դպրոցներին:

3.8. Բոլոր աշխատանքները պահվում են «Այբ»-ում մրցույթի անցկացման օրից հետո 4 ամիս: Մինչև այդ պահն ընդունվում են բողոքարկման հայտեր: Բողոքարկում կարող է իրականացնել միայն դպրոցը՝ այն դեպքում, եթե մասնակցի անունը չկա արդյունքների հաշվետվությունում, կամ եթե կասկածի տակ է դրվում ստուգման ճշտությունը: ***Խնդիրների բովանդակության և/կամ պատասխանների տարբերակների ճիշտ կամ սխալ լինելու վերաբերյալ բողոքներ չեն ընդունվում:***

3.9. ***Մասնակից դպրոցների արդյունքները չեն համեմատվում:*** Մրցույթից մոտ երեք ամիս հետո բոլոր դպրոցներին ուղարկվում են արդյունքների ամփոփ հաշվետվությունները, որոնցում նշվում են մասնակից աշակերտի վաստակած միավորների թիվը, նրա զբաղեցրած տեղը դպրոցում, մարզում, միասնաբար՝ Հայաստանում և Արցախում, այլ տվյալներ: Հիշեցնում ենք՝ դպրոցը ստանում է տեղեկություն միայն իր աշակերտների արդյունքների վերաբերյալ:

4. Մրցանակաբաշխություն

4.1. Բոլոր մասնակիցների, լավագույնների և հաղթողների մրցանակաբաշխությունը իրականացվում է մրցանակային ֆոնդից, որը ձևավորվում է մասնակցության վճարներից և հովանավորների միջոցներից: «Կենգուրուն» զանգվածային մրցույթ է, և մրցանակաբաշխությունը նույնպես զանգվածային է լինում: Բոլորի համար նախատեսված են հավաստագրեր ու փոքրիկ հուշանվերներ: **Բոլոր մրցանակակիրները ստանում են խրախուսական մրցանակներ**, լավագույններին շնորհվում են նաև պատվոգրեր, իսկ մրցույթի հաղթողները ստանում են գլխավոր մրցանակ: Բոլոր մասնակից դպրոցները ստանում են մասնակցության հավաստագրեր:

4.2. Գլխավոր մրցանակն արժեքավոր նվեր է կամ «Կենգուրու առանց սահմանների» ընկերակցության անդամ որևէ երկրում կազմակերպվող ամառային ճամբարի ուղեգիր: Ուղեգիրը ներառում է ճամբարում մնալու բոլոր ծախսերը, ճանապարհաճախսը, ապահովագրությունը և ելքի արտոնագիրը (վիզան): Ամառային ճամբարի ուղեգիրը որպես գլխավոր մրցանակ սահմանելը որոշում է «Այբ» կրթական հիմնադրամը՝ կախված տվյալ տարվա հաղթողների թվից, ամառային ճամբարների առաջարկից և տվյալ տարում Հայաստանին հատկացված տեղերի քանակից: Ամառային ճամբարների ուղեգրեր կարող

են տրվել միայն տվյալ տարվա հունիսի 1-ի դրությամբ 12 տարեկանը բոլորած հաղթողներին, ովքեր բավարար չափով տիրապետում են անգլերենին:

5. Մասնակցության վճար

- 5.1. Մրցույթի մասնակցության վճարը 970 ՀՀ դրամ է: Այդ գումարն օգտագործվում է բացառապես կազմակերպչական աշխատանքների և մրցանակների համար:
- 5.2. Մասնակցել ցանկացողները վճարումները կատարում են Հայաստանում «ՎՏԲ-Հայաստան բանկ» ՓԲԸ-ում բացված 16044015767700 հաշվեհամարին, իսկ Արցախում՝ «Արցախբանկ» ՓԲԸ-ում բացված 223171002460 հաշվեհամարին, բանկային մասնաճյուղերում կամ «Թելսել» (Telcell) և «Իզի Փեյ» (EasyPay) տերմինալների միջոցով: Վճարում անելիս պետք է հայտնել վճարման նպատակը, աշակերտի անուն-ազգանուն-հայրանունը, դասարանը, դպրոցի անվանումն ու համայնքը: **Բանկային անդորրագրերը** կարող են դուրս գրվել ինչպես մեկ կամ մի քանի աշակերտի անունով, այնպես էլ՝ ըստ խմբային ցուցակների: **«Թելսել» և «Իզի Փեյ» տերմինալներով** վճարումը յուրաքանչյուր աշակերտի համար կատարվում է առանձին:
- 5.3. Մրցույթին մասնակցելու համար **վճարում անելը բավարար չէ**. աշակերտը պետք է անպայման **գրանցված լինի իր դպրոցի մասնակիցների ցուցակում**:
- 5.4. Եթե աշակերտը չի մասնակցել մրցույթին (չկա դպրոցի վերջնական ցուցակում, կամ չկա պատասխանների թերթիկը), ապա նա կարող է հետ պահանջել մասնակցության վճարը՝ դիմելով «Այբ» կրթական հիմնադրամ մրցույթի օրից հաշված **մեկ ամսվա ընթացքում**: Գումարը կվերադարձվի բացառապես տվյալ աշակերտի ծնողին՝ վերջինիս դիմումի հիման վրա: Նշված ժամկետից հետո գումարը չի վերադարձվում:

6. Ժամանակացույց և քայլերի հաջորդականություն

- 6.1. Մրցույթին մասնակցելու Էլեկտրոնային հրավերը ստանալուց հետո դպրոցները մինչև **մասնակցության հայտի ներկայացման վերջնաժամկետը** նախապատրաստվում են մրցույթին հետևյալ կերպ.
 - նշանակում են դպրոցում մրցույթի պատասխանատուին և ընտրում դիտորդներին.
 - հայտարարում են մրցույթի մեկնարկի մասին՝ օգտագործելով www.kangaroo.am կայքում առկա պաստառը (տպել, փակցնել դպրոցում) և ֆեյսբուքի համար նախատեսված հայտարարությունը (տարածում են դպրոցի ֆեյսբուքյան Էջում/խմբում), իրազեկում աշակերտներին և նրանց ծնողներին մրցույթի և դրա անցկացման կարգի մասին.
 - տպում և աշակերտներին բաժանում են բանկում վճարման կարգի հիշեցման թերթիկները, հիշեցնում նրանց վճարման անդորրագրերը դպրոց ներկայացնելու և դպրոցի ցուցակում գրանցվելու վերջնաժամկետի մասին.
 - հավաքում են աշակերտներից վճարման անդորրագրերը և նրանց գրանցում «Մասնակիցների ցուցակում» մինչև հայտարարված վերջնաժամկետը.
 - «Մասնակիցների ցուցակի» հատուկ ձևը բեռնում են www.kangaroo.am կայքից կամ, կապվելով «Այբ» կրթական հիմնադրամի հետ, ստանում Էլ. փոստով: Ցուցակը լրացվում է **բացառապես «Այբ»-ի տրամադրած Էլեկտրոնային Նիշքում (file)**, .xls ձևաչափով, Sylfaen տառատեսակով (Unicode): Նիշքն անվանվում է հետևյալ կերպ՝ «դպրոցի ծածկագիր.xls» (օրինակ՝ 1234567.xls) և ուղարկվում kangaroo@ayb.am Էլեկտրոնային հասցեին մինչև հայտի ներկայացման վերջնաժամկետը:



Խնդրում ենք նկատի ունենալ, որ աշակերտների վճարման անդորրագրերը դպրոց ներկայացնելու, դպրոցի ցուցակում գրանցվելու վերջնաժամկետը և դպրոցի մասնակցության հայտը ներկայացնելու վերջնաժամկետը տարբեր ամսաթվեր են:

6.2. Մինչև հայտի ներկայացման վերջնաժամկետը դպրոցները փոստով պատվիրված նամակով ուղարկում կամ անձամբ բերում են «Այբ»-ի գրասենյակ **հայտը**, որը ներառում է՝

- մրցույթի մասնակցության հայտի լրացված, ստորագրված և կնքված ձևը.
- «Մասնակիցների ցուցակի» տպված տարբերակը. ցուցակի էլեկտրոնային տարբերակը **պարտադիր ուղարկվում է kangaroo@ayb.am** էլ. հասցեին.
- յուրաքանչյուր աշակերտի անունով դուրս գրված վճարման անդորրագրերի բնօրինակները կամ պատճենները:



Հայտը չներկայացնելու կամ ուշացնելու դեպքում դպրոցը **ՄՐՑՈՒՅԹԻՆ ՉԻ ՄԱՍՆԱԿՑՈՒՄ**: Հայտը հիմք է դպրոցին մրցութային փաթեթ տրամադրելու համար:

6.3. Մրցույթի օրվա ժամանակացույց

- Դպրոցի պատասխանատուն տարածքային կենտրոնից առավոտյան վերցնում է մրցութային փաթեթը:
- 12:00–14:00 ժամանակահատվածում դպրոցը պատրաստ է լինում սկսելու մրցույթը. սրահ(ներ)ը (դասասենյակ(ներ)ը) պատրաստ է (են), մասնակից աշակերտները՝ նստած, դիտորդները գիտեն իրենց պարտականությունները:
- Երբ ամեն ինչ պատրաստ է, մրցույթը մեկնարկում է. բոլոր մասնակիցներին բաժանվում են պատասխանների լրացման թերթիկներն ու հուշանվերները և բացատրվում են կանոնները:
- Պատասխանատուն բացատրում է պատասխանների թերթիկի վրա անձնական տվյալների լրացման կարգը և հետևում, որ բոլոր աշակերտները լրացնեն դրանք: Պատասխանատուն աշակերտներին հայտնում է դպրոցի ծածկագիրը և յուրաքանչյուրի հերթական համարը՝ ըստ մրցութային փաթեթում ներառված «Մասնակիցների ցուցակի»:
- Անձնական տվյալները գրանցելուց հետո՝ միայն, **մասնակիցների ներկայությամբ, բացվում է խնդիրներով ծրարը**, և խնդիրների տարբերակները բաժանվում են մասնակից աշակերտներին: Այս պահից հաշվարկվում է մրցույթի ժամանակը՝ 75 րոպե: **Հիշեցում: Բուն մրցույթը հարկավոր է սկսել 12:00-14:00 ժամանակահատվածում:**
- Ժամանակի լրանալուց հետո հավաքվում են պատասխանների լրացված թերթիկները և մասնակիցների ցուցակների հետ միասին անմիջապես դրվում համապատասխան ծրարի մեջ, փակվում և կնքվում:
- Դպրոցի ներկայացուցիչը լրացնում է պատասխանների թերթիկների ծրարի վրա փակցված արձանագրությունը: Ծրարը **նույն օրը հանձնվում է տարածքային կենտրոն մինչև ժամը 17:00-ն:**

6.4. Մրցույթից մոտ երկու ամիս հետո դպրոցին ուղարկվում է նրա աշակերտների արդյունքների հաշվետվությունը: Դրանից հետո տեղի են ունենում մրցանակաբաշխության արարողությունները, որոնց մանրամասները լրացուցիչ հայտարարվում են:

6.5. Բողոքարկումների դիմումները (ներկայացվում են դպրոցների կողմից) ընդունվում են «Այբ» կրթական հիմնադրամում մրցույթի անցկացման օրից հետո 4 ամիս:



Երևան 0037, Ազատության պ. 1/21-1

(060) 70-17-07, (093) 01-08-63

Էլ. փոստ՝ kangaroo@ayb.am